

Кузь нэм да бур шуд!

Шарма



гор

Эжва йывса войтырлөн газет


Петö 1929 восянь

Четверг, 2013 вося сентябр 12 лун 109 (10696)-öд №

Пыр кө лöдсалан, бийд оз куз (коми шусьöг)

Эжва йывлөн слава

Владимир Александрович Есев



Чужис 1936 вося декабр 30 лунö Дереваннойын. Княжпогостса ФЗО-ын велöдчöм бöрын 10 во уджалис Кулöмдинса райисполкомын шофёрн, 24 во-вöр овмöсын: Усть-Куломской лесопунктын рабочойн, Верхне-Вычегодской леспромхозын рабочойн, вöрса мастерн, шофёрн, уйысысьсьон, слесарн да диспетчерн.

Гöтырыскöд быдтис да велöдис кык челядьöс.

Уна вося бур уджысь сетисны «Уджывса ветеран» медаль да почёт грамотаяс.

Олö Кулöмдинын.

Тöдöй, мый выльыс

Вöчисны кытшолла туй

Вөр кыскалысь машинас öнi вермасны мунны Ягкöдж посёлок ордйöмн.

Матö 2 во ковмис котравны «Вöльдин» овмöдчöминса юралысьлы, медым гырысь техника кутис ветлыны кытшолла туйöд. Вöчис «Монди Сыктывкарса ЛПК»: кыпöдис туй, ваялис кöжа да шыльöдис 2,3 километр кузя туйкост, сувтöдис öлöдан пасьяс.

Выль велöдчан во вылö могъяс

Кулöмдинса спорт школаысь велöдысь-тренерьяс чукöртчылисны педсöвет вылö.

Выль велöдчан воөн найöс чолöмалис районса юралысь Д.А.Шатохин, сетис атгöалан письмöяс В.С.Мингалёвлы, Л.Е.Политовалы, А.В.Нестеровлы, С.М.Курочкиналы. Физкультура да спорт юкөн сöвмöдöм кузя районса администрациялөн удж йылысь юöртис райадминистрациян веськöдлысьöс вежысь Н.А.Левченко. 8 тöлысьон вöчöм уджөн тöдмöдис райадминистрацияысь физкультура, спорт да туризм юкөнн веськöдлысь А.И.Удоратин. Спортменьясöс дасьтöм кузя удж опытөн юксис Тимшерысь тренер А.А.Паршуков. Спортшколаса директор Е.И.Мишарина учритис 2013-2014 велöдчан во вылö могъяс.

Воисны том бурдöдысьяс

Районса бурдöдчаниньясö воисны том специалистьяс.

Районса шöр бурдöдчанинлөн поликлиникаын босьтчис уджавны врач-психиатр Марина Николаевна Галькович, терапия юкөнн терапевт Нина Александровна Соколовская. Югьдьягса бурдöдчанинö, шöр бурдöдчанинлөн инфекция да хирургия юкөньясö воис куйм медсестра. Став специалистыс ас районса.

Шоналисны садьяс, школаяс

«Коми тепловая компаниялөн» Кулöмдинса юкөнлөн тöv кезлö дась 21 шонтанн.

Вайисны 4 сюрс 23 тонна из шом, 4 сюрс 415 кубометр пес, ломтысигкежлö эм 37 тонна мазут. Сентябрь 10 лунö войсянь сетисны шоныд садьясö, школаясö, интернатьясö, бурдöдчаниньясö.

Отсалöны биысь дорйысьяс

Кольöм августын биысь дорьян 15 номера гарнизонас уджалысьяс туй вылын лöбмторьяскöд йитöдын петалисны отсöгөн квайтысь.

Таво 8 тöлысьон кышавлисны 65-ысь, петавлис 202 морт, 65 машина. Медся унаысь, 36-ысь, петавлис Кулöмдинса юкөн.

Ордйысисны футболысь

Сентябр 2-8 луньясö Сыктывкарын мунис кар да районьяс костын футбол кузя чемпионат.

Ордйысис 16 котыр. Кулöмдин район лоис сизимöдөн став район пöвстын да дасöдөн республикаса котырьяс пöвстын.

Путкыльтчис пос вомöн

Сентябр 11 лунö Кулöмдинса катыдпомын Шöр да Пожög уличаяс туйвежын пос вывсаысь путкыльтчис машина.

Тыдовтчис, мый том водитель вöли код юра. ГИБДД-лөн районса юкөннысь инспекторьяс сы вылö дасьтисны материал. Выль закон серти сийöс виччысьö ыджыд штрап, босьтасны и правосö.

Асланым да общ. корреспондентьяс, районлөн сайт вылысь.



Александр Михайлович Соколовский чужис да быдмис Кöртгерöс районса Мординын. Витöд классянь котралис лыжи вылын, көкъямысöд классын, кор сиктын вöчисны хоккейысь ворсанн, сувтис и коньки вылö. Кык во мысти нин вöли хоккейысь медбур ворсысьон. Школа бöрын велöдчис Сыктывкарса медводдза номера педколледжын, көнi ыджыд тöдчанлун сетис лыжиён котралöмлы. Водзö велöдчис Великие Луки карын физкультура да спорт академияын. Александр Михайловичлөн лыжиён котралöм кузя верстьö медводдза разряд, гимнастикаысь - коймöд верстьö разряд, кокни атлетика кузя спорта мастерö кандидат.

Велöдчöм бöрын во уджалис Эжваса, а сөсся куйм во юркараса школаясын. Таво гöтырыскöд локтис Кулöмдинö. Нина Александровна - районса шöр бурдöдчаниннын терапия юкөннн терапевт, а Александр Михайлович спорт школаын лыжиён котралöм да хоккейон ворсöм кузя велöдысь.

- Öнi Кулöмдинса шöр школаысь бöрья челядьöс, кодьяслөн эм көсйöм да сям, медым сувтны лыжи да коньки вылö. Танi бур стадион, лыжиён котраланн. Медшöрыс, район сетö ыджыд тöдчанлун спорт сöвмöмлы, - пасийс А.М.Соколовский.

Гижöд да снимок Марина ДАДАШОВАЛÖН.

КОМИ РЕСПУБЛИКАЫН

РЕСПУБЛИКА КУТЧЫСЬÖ ЗУМЫДА

«Петербургса политика» фонд донъялис Россияса регионьяс. Коми республика Вячеслав Гайзерлөн веськöдлöм улын босьтис 7,5 балл (кольöм тöлысьянь кайис 1 балл вылö). Республикаöс шуöма зумыда кутчысьысь регионн.

Августын бурторьяс пыин пасйöма сийöс, мый Емдин районса Казлук посёлокын воссис вөр переработайтан заводлөн медводдза юкөн, кытчö волис тшöтш республикаса юралысь. Сыктывкар, Вуктыл да Ухта костын босьтчисны лэбавны самолётьяс. Самолётн öнi позьö воодчыны и веськыда Перымöдз. Бур и сийö, мый жилищно-коммунальной овмöс вежлалöмлы отсöг

сетан фондсянь республикалы бара кутис воны сьöм.

Пасйöма и тырмытöмторьяс: Печора районса веськöдлысьöс вежысь Михаил Касаткинöс, кодi кывкутис жилищно-коммунальной овмöс вöсна, удж вылысь вештöм; «Россияса көрт туйяс» котырон Москва-Сыктывкар быдлуны поезд ветлыны дугöдöм.

«Петербургса политика» фонд йöзöдö ассыс донъялöмьяс быд тöлысь 2012 вося арсянь. Сийö донъялö Россия Федерацияса став регионлысь социальной да политической зумыдлун. Ставсö артыштöмөн, пунктöны 1-сянь 10 баллöдз, көнi 10 - медвылыс, 1 - медичёт балл.

Донъялöмьяс йöзöдигөн тшöтш пасйöны, мый бурис либö лёкыс лоис регионнын тöлысьон.

КОМИИНФОРМ.

